

**Nunatta pissarititai atorlugit sanaartornermut atortussiornermi tunisassiornissamik aallarnisaaniartut qanoq iliorluta tapersersorsinnaanissaat pillugu apeqquteqaat aallaavigalugu Inatsisartut oqallinnissaannik siunnersuut.**

(Inatsisartunut ilaasortaq Ineqi Kielsen, Siumut)

**Akissuteqaat**

(Ineqarnermut, Sanaartornermut Attaveqaatigiinnermullu Naalackersuisoq)

Illuliornerup sanaartornerullu iluanni eqqussuinermit annikillisisuusinnaasut suliniutit suulluunniit Naalackersuisunit qujarupparput. Tamanna atuuppoq, illuliornermut atortussat nunatsinni maani pisuussutinit piarneqartunit tunisassiaanersut imaluunniit nunaqavissut suliffissaqartinneqarnissaannut iluaqutaasumik illuliassat ikkussuinnarissat atortussaannik naammasseriikkanik sanaartorneq pineqarnerisq apeqqutaatinnagu.

Taamaattumik Naalackersuisunit isumaqarpugut qulequttap taassuma ullumi Inatsisartuni oqalligineqarnissaa pissusissamisoorluinnartoq.

Immikkut assersuuteqarnermini siunnersuuteqartup illuliornermi qarmasissiat Sikublock-imeersut taavai. Nunatta karsianit ineriartortitsinissamut taparserneqarluni Sikublock ukiut arlallit matuma siorna qarmasissiamut nunatsinni tunisassiarineqartumut taassumunnga neriulluarnartunik paasisaqarpoq. Kisiannili ukiut arlallit qaangiunneranni suliffeqarfiup tunisassiornini unitsippaa.

Issittumi Teknologiiq ineriisaavimmi taamatuttaaq qarmasissianik marraq Kangerlussuarneersaq atorlugu sanaajusumik atuilluni neriulluarnartunik inerneqartumik misileraasoqarnikuvoq.

Assersuutissat takutippaat qarmasissiat atorlugit iluliornermut teknikkikkut / aningaasaqarnikkut issittumi inissimanitsinni piviusumik periarfissaalernissaanut anigorniarneqartussanik unammilligassarpasuaqartoq. Ilaatigut issittumi silap pissusaata malitsigisaanik qarmasissiat atorlugit illuliorneq ukiup ingerlanerani piffissami sivikitsuaraannarmi ingerlanneqarsinnaavoq.

Taamaattoq nioqqutissanik illuliornermut atorneqartussanik nunatsinni sanaajusunik allanik ineriisaanissamut periarfissaq taakkuinnaangillat. Atortussanik atoqqiisarnermut arlallit soqutiginnilersimapput, assersuutigalugu pappiaqqat aamma flamingo-t ussissaatissat atugassat. Atortussanik atoqqiilluni atuisarneq eqqussuinermit annikillisisinnartussaangilaq, kisiannili aamma tamanna avatangiisinut iluaqutaasumik sunnuteqartussaavoq.

Illuliassani katitigassani atortussanik betonimik aamma illup saqqaannik aserfallatsaaliugassaangitsunik nunatsinni tunisassiarineqartunik ineriisaanissamut misileraanissamullu suliniutimmi isumassarsiarineqartoq Ineqarnermut, Sanaartornermut Attaveqarnermullu Naalackersuisoqarfiup suliaraa. Suliniut illuliornermi nunatta nammineerluni pisuussutaasa atorneqarnerulernissaannut – taamaalillunilu illuliornermut atugassanik nioqqutissanik eqqussuinissamut pisariaqartitsinerup annikinnerulernissaanut – kiisalu illulianik naammassineqartunik pitsaanagerusumik pitsaassuseqalersitsinissamut aqqutissiuussisussaavoq. Siunertamut tassunga ukiup tullianut aningaasanut inatsisissatut

siunnersuummi sanaartornermut aningaasaliissutit 2016-imi 2,0 mio. koruuninik aamma 2017-imi 2,8 mio. koruuninik Naalakkersuisut pingaarnersiuinermi salliutitsissamaarput.

Maannakkorpiaq atortussat betonimik sanaajusut atorlugit misileraalluni sanaartornermi Qaqortumi inissialiortoqarpoq. Misilittagaqalernissaq siunertaralugu misileraalluni sanaartornermi Nunani avannarlerni killerni illuliassanik tunisassiorfinnut isumaqatigiissuteqartoqarpoq.

Siunnersuuteqartup aallarnisaaniartunut tapersiisarnermut aaqqissuussat ujarorpai. Aaqqissuussanik taamaattunik arlalippassuarnik peqareerpugut. Inuussutissarsiutinik siuarsaanissaq pillugu inatsit malillugu Greenland Business nalinginnaasumik siunnersuisarpoq, aammalu siunnersuisartumik ikiorneqarnissamut, pilersitsinissamut kiisalu tunisassianik inerisaanissamut kittaartakkanut aaqqissuussaq malillugu taparserneqarnissaq periarfissaqarpoq. Siunertamut aningaasaliissutit ataatsimoortut aningaasanut inatsimmi tapiissutinut aningaasaliissutit immikkoortinneqartarput, maannakkorpiaq ukiumut 5,2 mio. koruuninik annertussuseqarlutik.

Suliniutinut taamaattunut, piujuartitsisussamik illuliornermut atortussanik tunisassiornermik aammalu illuliornermut atortut taakkua nunatsinni niuerfinni tuniniarneqartarnerannik siuarsaanermut iluaqutaasinnaasunik siunnersuutinut pilersitsiviusussanut, Naalakkersuisuni tusarnaarlupugut. Siunnersuuteqartut namminneerlutik inatsisinik suliaqarnissamut periarfissaq tikkuarpaat. Tamanna aqutissaassanersoq imaluunniit allanik ingerlaffiusinnaasunik aqutissaqassanersoq, apeqquteqaat aallaavigalugu oqallinneq tunngavigalugu oqariartuutinik ersarissunik paasisaqassasugut Naalakkersuisunit neriutigaarput.

Tamanna tunngavigalugu Naalakkersuisunit nalunaarutigissavarput, Inatsisartut oqaaseqaatissaattut siunnersuummut matumani saqqummiunneqartumut Naalakkersuisunit ilaliisinnaagatta.

Taamatut oqaaseqarlutik Naalakkersuisut pissarsiaqarfiusumik pilersitsiviusumillu oqallinnissaq qilanaaraat.